

四庫全書

集部

欽定四庫全書

集部

忠正德文集卷三

四

詳校官庶吉士

臣

翁樹培

侍讀臣孫球覆勘

膳錄監生

臣

周謨揚

膳錄監生

臣

俞錫玉

欽定四庫全書

忠正德文集卷三

宋 趙鼎 撰

奏議下

除右相論防秋

按鼎以紹興四年九月除尚書右僕射同中書門下平章事兼

知樞密院事

臣契勘韓世忠屬官陳桷等赴闕臣即子細叩問世忠防秋措置觀桷等所說可見世忠之意桷言世忠已過淮南相視控扼因桷等之來專令乞兵防守建康一帶

意欲令張俊分占江上同負此責亦如張俊聚兵之意也臣以為敵若不能渡江只留淮甸即委世忠專切固護通泰萬一采石等處不能支吾則敵騎深入遂有無窮之患雖能保守通泰亦復何益今若便令世忠保守建康又緣敵騎未渡之間當且以通泰鹽利為重臣之愚意欲乞戒飭世忠且在承楚極力捍禦或采石等處已聞敵騎南侵即令世忠全軍而還徑趨江東或浙西衝要去處或腰擊或尾襲雖不能遏其來路亦足牽制

少阻南侵之勢不能深入所有通泰鹽利在所不顧也

臣本不知兵更願陛下召張俊與議之或以為然即乞

召陳桷等面授此意及親洒宸翰以賜世忠不可坐視

安危恬不為意遂如議者所料也

張俊嘗言一旦江上有警即世忠先世等

各携老小登舟為自安之計必矣

臣一介書生辱陛下眷遇致身至此

敢不黽勉圖報萬分自入夏以來每以防秋為念而議論不一何由措手既入七月方二使南歸而又朱勝非求去紛紛十數日不定八月初即有川陝之命萬里之

行無一人一騎日夕經營自救不暇是以不能專一留
心朝廷之事今事勢已迫乃蒙陛下擢實宰司萬一小
有蹉跌萬死不足塞責臣已力陳懇款辭免誤恩或未
賜矜從即乞陛下博選中外忠誠可倚之人寘之二府
庶幾協濟少分陛下宵旰之憂臣不勝萬幸

貼黃陳楠言世忠患一軍老小留在鎮江非便臣乃
與楠議欲令遷來平江等處楠以為然此亦張俊之
意也併乞聖裁臣昨晚已奏稟乞令陳楠等上殿奏

事如陛下不欲召見即乞令與臣等議定速遣還軍
或別有處分韓世忠事亦乞降出付桷等以歸

乞親筆付諸將防托

按事見宋史紹興四年十月

臣竊見呂祉奏到金人已犯滁州界竊慮徑自桓州直
趨江上即建康一帶倉卒驚擾乘間濟渡別無阻遏大
兵未集人心易搖思患預防理宜隄備今欲備坐今來
探報劄付韓世忠疾速措置如承楚大兵并來滁和窺
伺渡江即仰帶領精兵捍禦掩擊兼張俊人馬已趨蘇

常卽浙西可保無虞。劄劉光世疾速統領人馬前來
建康府防托太平州等處并劄張俊等疾速差人硬探
滁和敵騎動息。萬一江上有警卽仰整齟人馬應援建
康一帶緣浙西非騎兵所長縱使濟渡不能衝突唯有
建康最為緊要深恐光世人馬未至間遂致侵犯臣愚
欲望聖慈用臣此意親洒宸翰以賜三將責其備禦勉
以功名且令宣導陛下問勞將士暴露辛苦之意所有
三將省劄見令修寫來進入

措置防托畫一事宜狀

臣昨日已具滁州探報事宜聞奏催督三將劄子適已
進今別有愚見仰竇聖聽伏幸睿察

一承楚敵衆恐非重兵雖臨江上未必敢渡緣近報濠
州對岸渦河口亦有人馬今承楚之人既至滁和即廬
壽隔絕勢須奔避而渦河之兵與承楚合而為一萬一
乘虛窺伺便有衝突之患理須過為隄備

一已議欲先遣大臣或聖意以謂目今可遣即乞批出

姓名且使乘傳自餘杭由廣德以抵建康伺察敵情號召諸將增重江東之勢俟劉光世軍到議定防捍會合之策即復趨行在所

一張浚人馬昨日發絕浚亦出門前去楊沂中老小不肯先發意欲同行即今別無措置事務臣愚欲乞擇定車駕進發之日行下三將照會使知臨幸有日即不敢稽留觀望

一初二日敵犯滁州界

按史紹興四年十月己卯金人犯滁州以丙子朔推之當是初

四日今已六日劉光世初四日承受移軍文字治行三日
初七日始能成行而馳至建康七百餘里勢恐未能相
及即采石一帶唯有杜琳鄺瓊李貴三項人馬不相統
攝難以責辦不得不過為之慮臣偶有所見敢不竭盡
伏幸聖聰裁酌可否

論親征

按史紹興四年十月丙子朔與
鼎定策親征戊戌御舟發臨安

臣今日扈從車駕登舟出餘杭門竊見道旁觀者無問
老幼皆以手加額咨嗟流涕以陛下冒犯風雨親總師

徒激勵將臣抗禦彊敵為宗廟生靈之計自靖康用兵以來未嘗有此舉措故得民心如此雖然千金之子坐不垂堂知命者不立巖墻之下陛下以萬乘之尊履兵戈至險之地苟懷愛君之心莫不憂之而臣待罪揆路實負此責是以不寒而慄當食忘味臣非不欲被堅執銳摧鋒陷陣為士卒先而書生懦懾之資不嫻戰鬪之事又事不素備勢難遽為府庫無半歲之儲關津乏控扼之具隨宜經理取辦倉皇徒有過差無補毫末所願

陛下憫憐駕鈍慮致於乖方開廣聰明兼收於衆智下
哀痛之詔捐內帑之金唯至誠足以感動於羣情唯勸
賞足以激揚於士氣堅惻怛艱虞之念草偷安苟且之
風則功業之成曾無難者此帝王之事在陛下神謀睿
斷思而勉之而已存亡所係安可忽諸故於進發之初
輒貢區區之懇儻少裨於萬一而臣亦預有榮焉臣不
勝萬幸

奏承楚事宜狀

臣等據兩日探報承楚敵兵挽舟北向似有回意及據秦州趙康直申已措置收復承州固已疑其別有姦謀今日詢問得承州之北新開湖可以通天長河入六合縣河內由瓜步可以出江果如此則凡清河之舟皆可為用無復阻滯矣又沈晦奏稱敵騎聚於六合按史紹興四年

十一月韓世忠遣兵劫金人營於承州破之金人犯六合縣則賊之計謀深有可慮

者臣等已作聖旨下沿江諸將過作隄備更乞陛下親筆以賜諸將責其必保萬全不得少有透漏及令同

協濟以紓今日之急

奏呂祉所陳狀

臣適蒙降出呂祉奏狀祉言敵已遁去固未敢深信而
所陳二策亦未宜遽作行遣俟別有的實探報然後措
置施行似未為晚兼臣已作書祝張浚如果有追襲之
計即如祉所言戒約諸將勿令妄殺伏乞聖慈更賜裁
酌

論降親筆付邵溥等

按事見宋史紹興五年五月

臣前日奏稟欲降親筆付邵溥吳玠獎諭裁損冗費等事臣退而契勘溥等議事在兩月前計今歸司已久猶未見裁損各件候奏到乃降親筆似為允當合具奏知

乞除朱震職名狀

臣竊見孟庾等已入文字面奉聖訓范冲除徽猷閣待制充資善堂翊善朱震充贊讀

按史繫紹興五年五月

范冲恩命

臣除別具辭免外臣伏見朱震文學行誼素為士林推重今與范冲同膺聖眷冲既陞次對則震不可獨無恩

數起居郎雖日侍清光終非兩制臣愚欲望聖慈亦除
震待制與沖並命不唯公論允協亦不欲獨寵沖益重
臣親嫌之謗伏惟聖聰加察

乞許亢宗與職名除郡

臣累奉聖訓在廷之臣趣嚮異同者稍澄汰之庶幾風
俗丕變治道歸一仰稔陛下灼見崇觀之弊不為時學
所惑臣每愧綿薄不足奉承睿旨竊見近日召對許亢
宗者乃葉夢得妹壻議論學術宗師夢得奏對劄子首

以知兵不知民為說意有所指但不名耳陛下不可不察以大臣荐進例有恩數且乞優與職名除近闕知州軍差遣似於公議允愜不至紛紛來日當進呈合先具奏稟

進廖剛世綵堂集劄

臣今早進呈廖剛乞以一官回授封贈祖父已得旨依所乞施行竊惟陛下以孝治天下故凡人子欲褒顯其親者莫不曲留聖意俯遂其請臣愚固知陛下孝養之

心未嘗少忘今復覽廖氏事迹聖懷不無感歎所有廖剛所編世綵堂集謹具進入

奏某人差除狀

臣今早蒙宣諭近所對與臣所聞之語大異臣即嘗奏陳乞少待魚來日係國忌日不應降宣命容臣十八日留身奏稟訖然後施行

乞追贈邵伯溫狀

按此篇永樂大典不載今從歷代名臣奏議增入

臣伏見故右奉直大夫提舉江州太平觀邵伯溫康節

先生雍之子伯溫自少出入富弼司馬光呂公著韓絳韓維范純仁之門程頤范祖禹深知之元祐初伯溫為布衣韓維以十科薦可備講讀後以經明行修命官維又薦學官范祖禹薦于經筵司馬光卒其子康亦亡乃特差伯溫西京教授俾教其孫植因以經紀光家事紹聖初章惇作相意欲用伯溫伯溫安于筦庫澹如也元符末以上書得罪名書黨籍坐廢者四十年靖康初召用一時名士諫議大夫呂好問薦為諫官宰相吳敏欲

以東宮官處之時戎事方興不果用建炎初除利州路
轉運判官遂請宮祠以卒臣宦學關陝二十年接其議
論熟其為人嘗歎其不可企及也竊惟陛下褒賢念舊
凡黨籍上書人皆被優恤况伯溫大賢之後行義顯著
平生所學迄不獲用深為聖朝惜之臣輒錄伯溫元符
末所上書進呈伏望聖慈特賜褒錄優加追贈以示寵
光豈獨伯溫九泉之榮實為士夫名節之勸臣不勝幸

甚

按宋史伯溫傳鼎少從伯溫游及
當相乞行追錄始贈秘閣修撰

論行遣章蔡狀

臣伏奉宸翰以章惇蔡卞罪惡貫盈當議追貶并其子
孫親戚不得與在內差遣仰認陛下崇奉宗廟之意臣
雖駑鈍敢不奉承今日方取見卞等見存官職來日取
旨行遣然臣愚意止欲及其子孫若并親戚斥之恐傷
陛下仁恕之德合具奏知
按宋史紹興五年八月追貶惇昭化軍節度副使卞單州團練副使子孫不許在朝不及親戚當即從鼎奏也

援任申先第一疏

按申先伯雨子以布衣特起至中書舍人

臣適蒙陛下降出仕申先辯訴言章奏狀緣兩日假故未及進呈又緣親筆不敢住滯為復只今行出或容臣二十一日奏稟訖然後施行從來從官落職不可無名必坐其奏狀乃降指揮臣詳觀申先所陳意以論列沈與求因緣致此言誠過差不為無罪臣願陛下廓天地之量少賜容忍以全事體若所言別無過當則何緣落職唯其肆言不屈衆所難堪而陛下能容忍之是乃盛德事臣區區之愚尚有曲折唯聖聰省察申先之得罪

於陛下激怒於衆人本因與求之事今若坐其所奏落職行遣臣恐張浚不免憂疑而章惇蔡卞之黨懼忻鼓舞於外矣以陛下寬仁大度不能容一狂直使大臣不安羣小交賀臣竊為陛下惜之臣備位宰輔無所補報惟有朴忠敢不竭盡

貼黃臣於申先非有所厚昨申先論列沈與求臣深不以為然亦嘗奏稟計陛下尚能記憶今申先奏章有議者謂臣不當與臺諫立敵此臣戒申先之言也

又言大臣方行臺諫之言以示無私則申先于臣不
無怨望而臣不避譴逐輒敢冒瀆聖聽誠以責一申
先為小故而其間所繫利害為甚大臣非敢倚張浚
為重陰濟其私意也伏幸睿照

援任申先第二疏

臣昨日嘗以任申先落職事叙陳曲折煩瀆聰聽伏蒙
聖慈俯鑒愚懇特賜親筆許令奏稟訖施行仰認天地
之仁少霽雷霆之怒不唯申先保全進退亦使臣下遇

有所見得盡區區無所隱避則陛下涵容之德高明博
博闊略細故所志者遠大矣幸甚幸甚然臣尚有欲告
于陛下者初陛下以伯雨之言追貶惇卞錄用申先所
以旌別淑慝明辯是非雖在九泉之下猶知懲勸則足
以為萬世臣子善惡之戒當時中外咸知此道復興者
以陛下聰明絕人洞見底蘊不為浮議惑而臣亦不量
微薄不避衆怨身任而當之今曾未幾時申先乃蒙斥
逐誠以臺諫四人之請陛下不得已而行之若又因其

赴訴之言更加削奪則非所謂十世宥之道也臣恐
惇卞之黨有以窺伺聖意禍機一發姦計遂行不特申
先粉碎雖如微臣勢難苟免是不得不懼臣故輒為申
先一言亦所以自為謀也併幸慈憐矜察

乞劉寧止等上殿

按宋史紹興六年二月遣劉寧止如鎮江總領錢糧是月

張浚至江上
會諸將議事

臣今早得張浚書以江上諸軍錢糧闕乏欲令劉寧止
向子諲早到鎮江議事今日已降指揮令寧止等於今

月二十四日內殿辭緣寧止等遠去各有奏稟職事欲許辭日特令上殿如蒙俞允伏乞早賜批出

乞抑內侍奏

按此篇永樂大典不載今從歷代名臣奏議增入

臣前日奏事殿中伏奉聖訓以言官張致遠論列士大夫有陰結內侍者陛下既駭且怒以謂此風寔不可長宣政之禍流毒至今不可不戒宜降詔開諭且令有司立法禁止臣待罪宰輔親承玉音仰見陛下不惑於甘言無徂於近習洞鑒覆車之迹灼知滋蔓之端好惡一

分邪正自辨帝王盛德事也雖然小人無他志在進取
不復顧藉至於壞風俗紊紀綱唱讒佞之風塞公正之
路以及於喪國亡家之禍皆所不卹茲宜可畏歟今雖
有所斥逐而潛形秘跡人莫得知物論所譏聖心未悟
者臣不知其有無而亦不能保其必無也臣願陛下力
懲而亟革之與其沮遏波流孰若絕去根本之為愈臣
嘗見齊威王封即墨大夫故事及本朝歐陽修奏疏仁
宗皇帝其議論事跡皆可稽考謹錄在前用見臣區區

將順之意亦因以獻規於陛下伏幸寬仁察斯忠懇

知紹興乞差兵馬防海道

紹興七年三月二十六日按筆錄鼎以

紹興六年十二月引疾除觀文殿大學士充浙東安撫制置大使知紹興府

臣檢準樞密院劄子節文已降詔旨巡幸建康見令有司擇日進發切慮四方傳聞不一三省樞密院同奉聖旨令諸路帥臣監司散榜分明告諭使軍民通知仍多方措置彈壓務在安靜及常切檢察部內如日前積弊有害軍民事件悉行革去續承旨符照會車駕巡幸今

月初九日已到建康訖本司已行下本路諸州府措置
彈壓及從本司出榜分送曉諭軍民通知去外緣本路
見管禁軍人數不多以至器械例皆少闕兼管下明州
邊臨大江海面衝要不止備禦山東賊界緣接連福建
不測海寇出沒若非朝廷差兵屯駐無以彈壓今車駕
移蹕建康兵馬事力悉在江淮之上則浙東一帶委是
空缺愚民好亂浙俗易搖食菜事魔之人處處有之未
易遽草萬一乘隙窺伺別起事端雖不能大段為患如

白馬源繆羅等輩不保其無是時雖多方措置撫卹終不若少屯兵馬之為實利也本路禁軍共有六千餘人除老弱不堪及差出之外不過有三四千人分在七州之內占破使用例不能免可以準備使喚曾無三二千人而相去稍遠逐州各欲為備緩急不能團結又全無器甲雖取會見管乞令修整非目下所可辦集深恐臨時悞事欲望聖慈特賜睿察差撥兵馬三五千人在明州駐劄或更於留守司添兵數千則雖朝廷在遠使

諸州緩急有所赴訴誠為利便臣以衰病已乞宮祠然
本路有此利害不敢緘默仰瀆聖聰無任隕越

經筵論事第一疏

按鼎以紹興七年八月除萬壽觀使兼侍讀此下二篇永

樂大典不載今從歷代名臣奏議增入

臣向蒙陛下不以臣不才寘之宰輔前後二歲迄無寸
功聖度兼容忘其所短懇辭去位禮意益隆粉骨捐軀
未知所稱今者待罪藩郡使得自佚曾未朞年遽叨召
命俾預經幄示不終棄自惟何者辱陛下知遇如此然

臣區區之愚有不得已者不免仰瀆天聽臣竊惟陛下
紹祖宗之業當艱難之時簡拔儒臣列侍講讀非欲分
章摘句為書生事業必將論道之餘訪以當世之務臣
雖學識迂僻不足仰裨聰聽亦欲少施所蘊時有獻替
是廼祖宗設置經筵之義况於今日乎臣謂陛下所當
諮訪於講讀之臣者內則政事之得失外則邊事機籌
而已臣之思欲獻之於陛下者亦無以踰此臣素不知
兵然兩經捍敵粗識事宜謂先固本根乃議攻戰屯大

將於江濱分精銳於淮上首尾足以相應聲援足以相
及敵雖強梁欲謀深入前迫大軍之勢後有尾襲之虞
而我之漕運既省民亦少安設或長驅頭舉而身隨矣
跨河越岱無不可者故於臨機應變之間反復憂慮以
持重為先或欲置之危地必取成功非不可勝之策也
若今之邊事規模宏遠事勢恢張固已盡善但與臣所
見偶不同耳亦非怯懦者所能知也臣昧於治體然昨
在揆路妄意區別謂朝廷之上屢立黨與呂夷簡范仲

淹之黨可合也學術政事所同而其人多忠厚老成之士王安石呂惠卿之黨可合也學術政事所同而其人多才能少俊之流至若元祐之人與夫紹聖崇觀之黨則不可合也學術政事不同而品流趣嚮之異也故於進退賞罰之際申嚴勸沮使人知所嚮或欲混善惡於一途則善類必沮傷納君子小人於同域則小人必勝理之自然害政之大者也若今之政事議論好惡黜陟取捨固已盡善但與臣所見偶不同耳亦非淺陋者所

能及也此兩事之外其他所不同者固不一而臣亦不敢自以為是顧頑冥之資執其所見而已今措置已定法令已行羣心退聽習俗丕變矣陛下儻欲採用臣言重為更革則中外擾擾何時而已臣行年五十有三衰疾侵尋死亡無日亦安能遽喪所守俛仰從人儻使厠跡諸儒議論之末陛下將何所諮詢臣亦自度無可獻之陛下者如其遂非不悛執迷難化永為棄物不復可用亦其分也是以聞命而來逡巡恐懼屢陳辭懇不敢

但已誠恐進對之言與時不合奉身求退重取慢命偃蹇之誅非陛下疇昔顧遇許以保全之意況自夏及秋足疾增劇痛楚浮腫有妨拜趨臣已別具劄子奏乞改除一在外宮觀外輒敢盡布腹心密聞於陛下惟陛下憐之俾臣終老山林死無所恨

經筵論事第二疏

臣已具愚見仰瀆聖聰尚慮所言未究所蘊重為陛下陳之且車駕駐蹕所在天下之根本也外設藩籬之固

中嚴堂陞之居然後從中制外運動得宜譬之人身有
腹心有手足不可易置也今捨二浙澤國險阻之區而
都建康顯敞衝要四達交爭之地修飭宮城移置官府
悉庫藏金帛隨之不鑿維揚倉卒之禍而為久遠安居
之計實臣所未喻也若謂建康古帝王之宅得形勢之
利然自堯舜三代秦晉而下建都不一各便其所宜而
未嘗相因不聞後王之興必居前王之地也若謂北臨
淮甸足以係中原之心便於進取之勢然移蹕已復半

年矣進取之計果如何中原之人歸者幾何響應而起者又幾何若謂易於號令然前此兩經捍敵車駕進臨鼓作士氣諸將奮勵承命即前倘朝廷威令不行駕馭無術雖在營壘中無益也不考利害之實不度時措之宜採書生之高談按史冊之故事而先自致於顛危之地乃曰欲圖恢復臣竊以謂不可雖然臣知定都建康未為得策而陛下苟因臣說遽議回鑾臣亦以謂不可也自朝廷南渡中外臣民莫不以恢復之說獻於陛下

臣自郎官歷臺諫至踐宰輔前後進計於陛下亦以此
為先陛下篤於孝悌固亦未嘗不在是也然而臣所期
於陛下者不忘恢復之念常為恢復之謀仰順天心俯
鑒人事度德量力觀釁而動不敢輕舉而易發也今恢
復之勢已張恢復之名已正凡平日獻議之人以謂恢
復之功可跂而待乃欲旋幸二浙偷安目前自為退縮
削弱之計必以陛下為不孝不悌之主以臣為不忠不
義之人夫不孝不悌之名固陛下不可受而不忠不義

之罪臣亦安敢當之此議論之臣他日必不見貸者臣
所謂欲議回鑾亦不可也蓋一動移之間便有強弱之
勢不可遽也嗚呼採虛名忘實利張虛聲受實禍其利
害為如何而浮言易動主聽易搖使任責者難於致力
而天下之事所以易敗而無功也今為陛下計唯是委
任羣臣不責近效俾盡前日措置之策必取今日規模
之利用副陛下孝悌之心不難也如臣怯懦愚闇實不
足以及此人有能不能前日之規模措置臣之所能也

今日之規模措置非臣之所能也不強其所不能古人
所取也今以不能之事責人以必能其人殺身不顧也
赤族不恤也其如國事何進讀帷幄雖不預國論萬一
陛下諮訪見及臣之所言不過如此其言非今日之宜
則其人難語以今日之責矣然則何所用之臣所以不
避雷霆之怒仰干斧鉞之誅披瀝血誠控告陛下誠不
敢愉悅取容以欺聰聽耳伏幸察臣哀切之懇曲垂惻
隱之仁恢廓網羅保全腰領投之於無用之地臣雖死

之日猶生之年

建康府軍兵強奪民物等狀

按史紹興七年三月帝至建康八年

二月發建康鼎再
相在七年九月

臣聞天子所至曰幸以其布德澤問疾苦號令風化所
從而出今車駕駐蹕建康宜其加惠斯民使之忻戴而
軍律不嚴郡政不舉以強凌弱無復紀綱每兵數人結
為一黨或強奪所賣之物不還價錢或抑令空手之人
般負錢米小不如意毆擊隨之寃痛之聲聞者傷惻將

佐自以為得志廟界亦不敢誰何遂使闌闌之中日有橫逆之苦臣嘗建言乞令三衙廣布察視分占地分嚴立賞罰及令諸軍貼差使臣應有所犯以次坐之不知曾無降出而民間之患甚於前日今欲檢舉臣前章早作措置仍乞責問建康府縱容弛慢坐視不恤之罪或令所在火保團頭等常切覺察應有似此之人即仰率衆捕捉如敢拒捕不以所犯重輕並依軍法捉事人量加激賞如此則姦惡小戢而嗷嗷疲悴之民有所赴愬

矣

論水軍作賊劄子

臣嘗上言府城側近往來舟船間被劫掠乞令三衙廣布察視分占地分及乞諸軍貼差使臣分統其衆應有所犯以次坐之後因城中軍兵強奪人物再乞檢舉前章仍乞詰問建康府弛慢容縱坐視不恤之罪臣不知曾無措置施行今聞城外劫掠益甚數日前權上元縣竇經前鄜州通判朱褒舟至近城皆被劫奪骨肉痛遭

傷害行李一掃無餘流離異鄉無所伸訴然臣所知者
止此而不知者日有之不可勝計也皆云多是水軍作
過以其在城外得以自如又有小舟可以出沒若將之
不得其人禦之不得其術則沿江往來肆其患害殊未
已也不知主將為何人雖諳曉水軍利害而縱其部曲
不能鈐制猶當責罰使之畏懼若其泛泛一武夫則賤
而黜之可也別選曉軍政能統轄者代之仍乞指揮建
康府重賞捕賊期於必獲寘之重典併以坐其部轄之

人庶幾少戢不為江路往來之患此細故責在有司不當縷縷仰瀆聖聽若有司非人則朝廷安可置而不問臣是以輒言之

奏韓世忠屯軍事宜狀

臣昨日伏蒙降出韓世忠劄子奏屯軍事宜并世忠與臣書及世良到臣處所說世忠之意一聽朝廷指揮臣見再作書與世忠議所留人數俟議定乃敢決留更當招溫濟到此詳論曲折然後施行合具奏知

乞辦黃醵事

紹興七年十月十九日

臣前日伏蒙聖訓黃醵差除有人論列臣雖未見所論章疏伏聞有買田交結之事醵浙人兩年前不記何人薦引召對改官臣以素無雅舊未嘗款語亦不曾與差遣醵乃請宮祠而去自後聲問相絕所謂交結不知指為何人因言者奏對伏望陛下面叩之如得其主名然後再加詢究考證有實寘之於法亦不足恤萬一風聞不審事涉疑似使士大夫曖昧受謗不能自明恐非陛

下愛惜人材之意臣不欲頻留故此奏稟干瀆聖聰無
任皇恐戰慄之至

又

契勘連日節假未有言官班次或降親筆詢問俾令密
奏庶幾早得主名免惑聖聽先帝臨朝時每因臣僚論
事或有所訓諭往往密降御筆臣於御史中丞陸德先
家多見之併乞睿照

又

臣伏蒙降出李誼言章乃是泛言結識未必實有主名然臣私憂過計遽以狂瞽仰瀆聖聰顧雖九殞不足塞責其餘曲折容臣別日奏稟李誼章疏謹復進入

請與潘良貴等職名宮觀狀

紹興八年按此篇永樂大典不載

今從歷代名臣奏議增入

臣昨日入省致齊不當趨朝奏事伏見親筆批諭潘良貴及常同差遣臣以不簽書刑罰文字兼職名未定須俟面奏然後施行臣嘗謂朝廷貴在安靜安靜則和氣

蒸薰天下自然蒙福今幸朝多君子無乖異之人攪擾其間足以坐致安靜之風而良貴天奪其魄輕舉妄發而常同輩又不分別曲直隨俗毀譽自作不靖致此紛紛仰惟陛下以日月之明照臨百辟天威神斷曲盡事情在臣之愚無復可議然尚有一得之慮欲已不能冒犯威顏無所逃罪臣於此數人者何有厚薄之異至於進退取舍實關國體在臣不敢不言也張絢良貴皆二浙之士與臣本無契分常同雖嘗薦之然自作言官屢

以語言侵臣嘗因此懇求避位子諲始識於种師道宣
司幕中雖戚里貴游子弟而好學樂善文雅有餘平日
交游議論之間凡有補於正論有助於善類者未嘗不
竭其誠心士大夫以此稱子諲而子諲亦以此受知於
陛下至如良貴常同輩皆子諲素相欽重者今常同既
出張絢決不可留是因子諲而致此數人相繼而去恐
於子諲不甚光美亦非其本心也臣輒獻愚忠願陛下
少留聖慮如子諲無罪不當外補或陛下不欲私潛藩

之舊即乞優與職名處之近郡非晚復可召用良貴與次等職名即與小郡與本等職名即與宮觀如此則重輕一分而賞罰之意天下曉然知之矣常同張絢且降不允指揮俟行遣良貴等了絕然後徐為區處或移閑慢或令補外無不可者庶幾朝廷安靜士論厭伏足以彰陛下包納狂直之美而子諲去就之間亦復盡善矣且良貴等今日之過誠不可恕若考其平素亦曰端良之士倘一旦併逐深恐子諲心懷憂鬱益不自安蓋其

人畏義而樂善故也臣區區愚直豈敢懷私黨庇如陛下不以臣言為然即一如親筆批諭行遣未晚然臣待罪宰輔實不欲呶呶之徒妄議朝廷亦所以愛惜子諲耳不避煩瀆重取誅譴唯陛下深加省察臣不勝萬幸

乞賜岳飛親筆

臣今日得岳飛書已定十月十九日出師臣竊惟大軍一舉所係非輕臣願陛下以收復境土拯救生靈為念誠心默禱克享成功仍乞親筆賜飛勉以盡忠體國之

義使之激勵將士共立功名臣已累具奏陳乞在外宮觀然備位大臣不敢以中外為間併幸睿察

罷政奉祠奏議

紹興九年正月十六日 按鼎以紹興八年十二月請祠除醴

泉觀使任
便居住

臣昨蒙恩罷政甫離行闕即聞人使及境既而得請宮祠杜門養疾其外事絕不相關今月初六日伏見紹興府宣示赦書乃知大義已定悉如向來臨遣之旨然臣在田里間竊聽士民之論間有疑而憂之者謂一旦通

和之後兵政武備勢必少弛萬一復有乘隙侵凌之患
倉卒何以待之此蓋遠方之人不知朝廷自有措置而
私憂過計妄意如此其區區之心有足嘉者臣受恩最
深既老且病永乖圖報之効尚有納忠之愚伏望陛下
俯察輿言重留聖意深念前日之禍益思善後之謀上
自聖躬下逮庶政兢兢業業毋忘泛海防秋時用以釋
天下憂疑之心圖社稷久長之計慎終如始永底丕平
而臣犬馬餘齡侵尋無幾所苦渴疾日益增加固雖老

死海隅會有返國鄉關之日臣不勝至願

欽定四庫全書

忠正德文集卷四

宋 趙鼎 撰

四六

辭免知樞密院川陝宣撫處置使

囊封荐布覬誠悃之上昭綸詔寵頒顧愚衷之未諒輒
復冒昧終幸慈憐謝中伏念臣才不逮人學非適用偶緣

際會遂致叨踰曾微尺寸之功積有邱山之釁林泉陋
質寧裨帷幄之籌詩禮腐儒曷奮干戈之衛遽膺簡擢

第劇震驚自知甚明豈復堪於重任人言可畏將上累
於眷私伏望皇帝陛下乾覆博臨離明洞照仰屈蓋高
之聽俯推從欲之仁特發俞音示曲全於終始庶陳繇
力或未至於顛隳

謝除知樞密院事川陝宣撫處置使

進登右府深愧超踰專任西陲曷勝負荷恩隆天地懼
甚永淵謝中竊惟關陝之雄壯觀萬國巴蜀之利害溉九
州自古恃形勝以威華戎列聖宿驍銳以固根本上天

界禍強敵興戎萬乘遠狩於海隅數路盡寘之度外膏
腴千里遽為荆棘之墟彊盛百年忍棄俘縶之辱雖長
鞭未及於馬腹顧夕烽未靖於狼烟經營淹歷於歲時
憂顧上勤於宵旰謀元帥宜屬英才伏念臣智術迂
疎技能寡薄誤蒙異眷驟越稠人再陪帷幄之嚴蔑有
錙銖之報位高寵厚餅蠹之器已盈任大責深駑蹇之
力弗任矧空言不必有實而腐儒未嘗知兵豈意聖明
猥加推擇此蓋皇帝陛下焦勞圖治寤寐進賢思致中

興之隆灼知當務之急者惟西上欲臻休息之期庸遣
邇臣徃布拊循之惠付之以本兵之寄假之以專閫之
權將備責於施為固不容於遜避臣敢不仰遵勝筭益
懋良圖志殄仇讎儻可伸於素願身先士卒敢自愛於
微軀

重脩神宗皇帝實錄繳進表

按宋史紹興五年九月鼎上重脩神

宗實錄

臣聞三代而上堯舜禹湯文武之相傳五伯以還秦漢

魏晉隋唐之殊襲不有經史孰鑒興亡故歷代官有其
常俾後世信而可攷中恭以神宗皇帝躬剛健篤實之
美稟聰明睿知之資志大有爲功收不宰布諸典冊燦
若日星逮紹聖之改元彼日錄之來上假名繼述公肆
詆欺盡虛美熙寧變更之臣反歸坐元祐謗訕之罪用
以脅持於上下豈惟攘竊其猷爲人不敢言史成此禍
忠臣義士抱懣積年仰惟陛下肇開中興克紹先烈雖
干戈未定居嘗憤記史之誣而歲月寢深大懼失貽謀

之實載頒明詔復俾儒臣念茲皇祖之彌文有待翼子之所燕臣謬膺揆路兼領史權猥資僚屬之能獲與纂修之首朱書新錄墨本舊文凡去取之不同皆存留於考異詳原私意灼見姦言初憂頭白之無期不謂汗青之有日百端牴牾一切編摩告功合雅頌之稱尊王法春秋之旨大君有命銳然成不刊之書小子何知例以為不急之務允矣七閏之業大哉萬世之謨願勤乙夜之觀益見後昆之裕油雲霈雨曾不須臾白日青天終

難掩蔽所有神宗實錄二百卷并考異二百卷謹繕寫
成冊除已各先進五十卷外其餘卷帙謹隨表上

辭免實錄成除特進表

愚衷自列懼錫命之過優聰聽未回致俞音之尚閔情
深怵惕罪實僭踰中謝竊謂簡策所傳古今取信惟紀事

之有實雖歷世而可知苟或異同固當參考矧一朝之
大典付三館之羣儒刊正是非發明謨烈逮更累歲方
奏成書考其論撰之功宜有褒嘉之異顧茲職守止預

監修寵數荐加戰兢無所伏望皇帝陛下曲回造化俯
賜照臨推王者從欲之仁徇匹夫難奪之志憫危機之
可懼收渙汗以何嫌冒犯威顏甘俟誅譴

謝恩數

進書辭免光祿大夫特進從請賜銀絹
對衣金帶一子六品服按紹興正論

作三
品服

信書進御初無是正之功寵典荐加卒冒分頒之賜固
辭莫遂拜貺爲慚中謝伏念臣學識迂疎材能淺陋久玷
樞機之任適臨紬繹之司竊惟皇祖之詒謀昭若曜靈

之垂象雖嘗竄以私錄迄難蔽於姦言粵稽同異之歸
具存前後之史發揚淵懿悉本於清衷刊定謬誣兼資
於衆智敢期優渥猥及妄庸賞以勸能顧微臣之何力
服之稱德假賤息以奚名此蓋伏遇皇帝陛下增賁堯
文仰繩祖武成一王之大典傳百世之鴻休爰褒筆削
之勤濫被振提之末煥身章於父子感佩君恩旅珍幣
於家庭實慚民力誓期盡瘁上答殊私

謝史館進書回授恩列表

崇階極品懇辭甫遂於愚誠命服優恩光寵復加於賤

息省循非稱悚懼增深

謝中

伏念臣起自寒微備嘗險阻

晚叨眷獎浸被使令初無臯陶可績之謨荐承傳說交

修之訓經綸無術曾未濟乎艱難撰述何功遽首蒙於

渙渥恩淪骨髓光動階庭靜言庸違實為僥冒此蓋伏

遇皇帝陛下懋昭舜孝克廣堯仁念繼序而不忘俾纂

修之盡善第推恩數示勸臣鄰臣謹當佩服詔旨益嚴

師訓日聞詩禮敢怠於教忠志在國家誓圖於盡瘁

謝生日賜牲餼表

紹興六年

垂弧既遠方感於劬勞賜品有加遽霑於慶賚荷分頒之甚腆思稱效以彌難謝伏念臣偶玷榮求居慙固陋職參師律莫施借箸之籌位忝台司久負作霖之命惟期罷黜少弭煩言伏蒙皇帝陛下茂舉彝儀優隆近輔俯記始生之日曲推乃聖之仁錫以稻粱申之牢醴憐蒲柳之弱質俾續於年齡均庖廩之餘珍用資於燕喜仰銜覆育誓罄糜捐

謝知紹興到任

紹興六年十二月初八日
除七年正月十五日到任

揣分求閑宜從上印疏恩示寵乃辱分符崇以祕殿之
班撫此連城之俗朝廷密邇閭里安閑何所施為自然
康靖謝中伏念臣區區末學蹇蹇孤忠久煩臨照之私竊
覬糜捐之報自塵揆路再閱年華亮采惠疇未有絲毫
之効陳力就列空驚齒髮之彫蓋屢瀆於聰明願少休
於疾病及茲得請載冒殊恩初期退奉於祠宮稍勤香
火豈謂更優於藩翰付以人民矧此稽山望隆越絕露

章傳舍嘗稱漢吏之榮修禊蘭亭嘗想晉人之逸有何
勞効獲此便安茲蓋伏遇皇帝陛下愛厚股肱恩隆體
貌使之出守示無內重而外輕借曰無功猶恐前愚而
後智於臣進退可見保全臣敢不仰戴深仁益殫晚節
宅心平易布政中和顧久侍於前旃孰宣德意但躬行
於聖訓即副民情

謝進哲宗實錄書成除特進表

按筆錄紹興八年九月哲宗實

錄書成授特進宋史及
紹興正論繫六月誤

忱辭屢貢方俟於俞音溫詔荐頒莫回於聰聽遂巡拜

命感懼交懷

謝中

竊以特進崇階蓋參一品之貴實封加

邑必由三歲之祠其間耆德夙望之隆或是將帥勲勞
之著膺此異數乃協師言矧信史之告成因舊文而刊
定細書載筆雖閱歲時振領提綱曾何績効遽叨光寵
但切戰兢此蓋伏遇皇帝陛下仁孝生知聰明時憲念
泰陵之繼序辨聖烈之謗誣累年於茲大典克備肆推
褒錫首及庸虛臣固當仰體眷私益思策勵而久妨賢

路常懷患失之譏退奉真祠即控辭榮之懇尚祈天造
俯鑒物情

謝再除紹興到任表

按鼎以紹興八年十月除
檢校少傅奉國軍節度使

充浙東安撫大
使知紹興府

尸榮揆路無裨廟算之奇假守稽山復叨閫制之重恪
宣條詔遄留部封謝中伏念臣性質顓愚器能譎薄少從

師學計已拙於謀身晚被聖知心但期於許國兩膺枋
任四閱歲華破朋黨之相傾惟賢是薦懲風俗之大弊

所見必聞徒殫駑蹇之誠莫效涓埃之報臣猶自愧人
豈無辭敢圖陳力之方積有妨賢之畏力求閑退尚辱
眷存憐其心膂之近僚付以股肱之大郡戴恩甚懼撫
已增慙此蓋伏遇皇帝陛下齊德乾坤同明日月擴勾
踐養胎之義惻昭王恤病之仁而臣久侍清光備觀宸
斷逮茲臨遣得以遵承謹當細大必躬夙宵彌勵庶收
薄效少答鴻私

謝泉州到任表

四月二十一日
紹興九年二月除按典以
知泉州

愚誠上達方逃會府之繁申命中頒復拜名藩之寵仰
銜至意不敢終辭亟引道以騰裝已合符而視事異恩
山重危涕雨零

謝中

伏念臣才不適時學非聞道初心耿

耿誓許國以忘身末路區區欲庇民而尊主適中興之
昌運荷特達之深知顧晚節以何堪謂樸忠而可信間
登帷幄荐冠鉞衡不知權變之宜奚補艱難之際閱時
寢久屬疾難勝亦既就閒再叨假守命出九天之邃道
更千里之遙俟駕靡遑褰帷戾止退循疵吝曷稱使令

此蓋伏遇皇帝陛下志在宅中仁深及物駕馭英傑肆
成克復之功體貌舊臣重責蕃宣之効綸言有耀汗號
莫回臣敢不祇服訓辭恪施條教持身率則草閭俗之
浮夸刻意咨詢究海邦之利病或少輸於報効當繼請
於便安

泉州謝落節表

罪尤昭著合正明刑仁聖優容止從寬典恩深淪骨涕
下交頤中謝伏念臣奮跡寒鄉莅官速服羈孤寡與進取

何階歷半生州縣之勞分沈白首偶千載風雲之會遂
躡華途粵自渡江之初首寘思言之列旋從樞筦荐守
侯藩獨持將相之權兩冠鈞衡之任處人臣之極地蔑
著勞能蹈富貴之危機拙於周慎叨塵既久蓬繆滋多
自信直前執迷不反咎將安往罰其可逃是致煩言併
塵睿覽即具釁戾當永棄於窮荒保以初終尚遠臨於
民社此蓋伏遇皇帝陛下明齊日月德合乾坤念犬馬
之服勤嘗叨任使憫桑榆之迫暮有足哀矜用全體貌

之私併示臣鄰之勸臣仰銜恩紀祇服訓詞寸髮寸膚
荷再生於洪造一邱一壑祈終賜於餘齡

謝到潮州安置表

按鼎以紹興九年十月責授
清遠軍節度副使潮州安置

省躬知過宜湯網之不遺屈法施仁荷堯雲之曲庇徒
知幸免何以自容

謝中

伏念臣才不通方力難任重冒竊

寵靈之久積成豐戾之多屢揣分以祈閑亦蒙恩而賜
可而臣憂患踵至羸瘵日增始抱疾以還家即銜悲而
哭子齒髮彫瘁於感傷之後精神昏耗於驅馳之餘其

誰為之無足憐者載念百為之俱謬寘之九死以奚逃
自信直前安處危機之上執迷不返卒投罪罟之中幸
沐洪私止流荒裔聞命就道寧辭險阻之備嘗杜門省
愆更覺悔尤之自取噬臍莫及流涕何追此蓋伏遇皇
帝陛下天度并包離明旁照曲全體貌獎勸臣工憐臣
簪履之餘嘗叨顧遇察臣桑榆之暮不足誅夷臣敢不
上體不殺之仁益勵自新之志身留瘴海分甘老於漁
樵目斷雲天心永傾於葵藿

謝到吉陽軍安置表

按筆錄紹興十四年十月移吉陽軍十五年二月至

吉陽宋史及紹興正論繫十四年九月誤

一謫五年咎將誰執再投萬里戚本自貽罪大難名恩

深莫報

謝中

伏念臣起從孤遠幸際休明猥被眷知叨逾


寵數既昧禍福之倚伏不虞罪惡之貫盈宜自省循益

疎周慎天其或者將必至於顛隳臣猶知之固難逃於

譴罰苟全要領有愧面顏此蓋伏遇皇帝陛下性蘊堯

仁躬行舜孝王者之法難犯固有刑章聖人之德好生

終歸善貸如臣繆戾尚辱哀矜白首何歸悵餘生之無
幾丹心未泯誓九死以不移



[illegible]

欽定四庫全書

集部

忠正德文集卷五

六

詳校官庶吉士臣翁樹培

侍讀臣孫球覆勘

謄錄貢生臣黃琮

謄錄監生臣單可彥

欽定四庫全書

忠正德文集卷五

宋 趙鼎 撰

五言古詩

己亥秋陪伯山遊中條窮盡山中之勝明年春

迓王毅伯再過山下呈伯山

條山有佳色不入俗子眼結廬傍涑水永與山作伴一
脚踏宦遊坐歎千里遠長恐山靈檄重令猿鶴怨竭來
河之湄用意固不淺擬從水石行稍釋煙霞戀而於闌

關中舉首即相見相看猶有情不改舊顏面自憐非故
吾撫心祇媿赧唯公絕俗姿體道任舒卷笑揖浮邱伯
雙鳬脫羈絆步武招我陪放歌容我亂窅窅空翠間風
馭躡雲棧山亦為君容景態互明煥別去今幾時茲遊
倏飛電所思在巖壑欲往不得便此身被官縛事迫胡
可緩東風漲邊塵羸馬注長坂崎曲餘百里盡日期往
返問途策而前不復微吟歎向來經行處猶作生綃展
悵念捫蘿手去斂趨庭板忽放微雲開顧我一笑莞出

沒高樹端退避還偃蹇俗駕良已非塵容更增醜解鞍迫
昏暮假榻憇疲懶夜夢五老人詰話不容辨局促將安
之勇退在能斷利害甚白黑胡為兩交戰語已去飄忽
欲留不可挽那知有志士居以貧為患求田亦本謀他
日當能辨伏櫪馬告勞投林鳥知倦歲時耕耨餘食息
桑榆暖優游聊卒歲誰復議樗散却坐涑水傍適我結
廬願

陪王毅伯遊柏梯寺次毅伯韻

伊昔耐辱人

司空表聖自號耐辱居士

誅茅此山谷愛閑如愛官食

薇如食肉酌泉吸山光清泠飽空腹故居今宛然修簞

蔽山麓我亦困塵籠暮年思退縮道人梯柏處夢想長

在目崎嶇乃夙心寧問隘車轂危蹬亂水石悲風號竹

木欵步轉嶽芽舉頭蒙樸藪徑欲走其顛仰羨孤飛鷺

層峯擁戶來何啻三十六幽人豈知此相對一茅屋真

成拓異境不勝無遺鏹夜枕却生寒尚煩盃酒燠清夢

那得長魚鼓驚晨粥五老曉相迎霧雨如盥沐引我眺

北嶺生覺天宇盛朝日湧地低明霞疑可掬欲留採黃
精媿此鬢髮禿正恐泛槎星已見君平卜

次韻

平生隱遁資白駒在空谷儻令眼有山寧問食無肉要
當揖爽氣滌此勤書腹得官大河濱枕帶首陽麓如聞
五老勝坐使山峰縮捫蘿上巉絕作意快心目却視宇
宙間萬化轉一轍道人真有道直上駕危木神光秘巖
隈靈草蒙樸藪空令蓮社子紛擾亂鳬鶩先生志高古

真遊窮六六飄然清夜夢時到山頭屋念此感塵迹一
往如飛鏃哦詩示觀覽律呂回春煥作字紀經行典刑餘
食粥使我蒙鄙心蓬首加櫛沐致我外塵垢益歎生理
感夜漱落箭泉明月冷盈掬朝飮過靈峰何憚屐齒禿
茲焉畢餘齡更無疑可卜

再次韻

蒼顏五老人潛此十里谷孤標面有稜瘦骨飢無肉手
揮雲霧開絕澗坦其腹乃知奇偉狀未省出山麓窮幽

偶見之欲遁不及縮亦憐麋鹿資笑睨回青目政欲挽
渠衣未應回我轂却顧巖壑底鬱鬱聳喬木尚茲遺棟
梁况乃問樸菽我亦脫網羅江湖漾孤鶩念此難折腰
本無蘇印六何意從公遊大嚼渠渠屋公仍為銷寫妙
語矜破齧一看雲卧冷固鄙權門煥懸知飮藜羹不換
咄嗟粥笑我漫彈冠短髮不勝沐真恐緣壁枯莫作蝸
行戲但當葺詩業萬象入吾掬要與麴生狂一掃中書
禿此計是耶非更擬從公卜

王官谷夜歸次伯山韻

讀公出谷詩語峻有骨肋使我兩目明燭籠照昏黑欲
和輒復已夜漏下幾刻

出郭次伯山韻

道心日和平向人絕城府雅意在泉石外物等泥土終
尋勾漏公丹砂養龍虎

欲遊靜林不果

林泉共一山欲往不得暇我不如陶生日到遠公社安

得縮地術坐我雲門下

翠微閣

秋山插半空山半倚危閣游子山下行秦川正搖落日
暮天宇寬西風卷雲幕

南泉

陰液淪山顛天匠鑿其腹噴薄湧飛泉散落珠百斛幽
人時一來但愛消煩溽何當作膏雨萬里蒙霖霖

還城次必強韻

俗駕不可留歸途無乃遽未飽愛山心復踏還城路今
彼城中人朝暮催鐘鼓

獨樂園夜飲梅花下再賦

我有一樽酒為君消百憂當春梅盛發去作花間遊
嫦娥從東來愛此亦遲留便欲買花去玉玦戀枝頭
花動月光亂月移花影流橫斜滿盃盤酒面香浮浮
舉觴吸明月與花相勸酬君若不盡飲恐為花月羞
緬想李太白對酒無朋儔當時明月下還有此花不

次韻酬贈元長少卿

夫子稟家學玉德潤無色搢紳先生間早歲聲籍籍晚
乃落筌蹄雲空鳥滅跡功名翰墨場一笑兒時劇

寄贈向叔美二首

夫子冰玉質未肯汚膏梁坐此困州縣一飽猶皇皇懷
才幾時用鬢髮行老蒼今世無伯樂不識真乘黃
結交恨不早天意非人謀論文一樽酒邂逅古虞州我
嘗評其人請從前輩求紛紛比薄俗定將誰與儔

夢覺一首時將解安邑赴調

明月入破窓一室炯如曉幽人睡易驚遙夜正寒悄自
緣懷抱惡安得夢寐好推枕惘不樂念念墮空杳所思
天一涯忽忽令人老老境足悲傷窮愁更縈繞嗟余竟
奚為濫為策名早漫漫戲一官不覺成潦倒况此百日
中隨分接紛擾跼如轅下駒孤甚沙洲鳥未妨公事多
但使癡兒了州縣定勞人侏儒尚能飽毋作腐鼠嚇要
同牛驥皂更憐愛酒陶未免空囊趙去矣莫留行崢嶸

歲云杪三宿戀桑下千載歸華表更堪無定居驚飈轉
蓬葆卧聞南飛鵲悲鳴樹三遶念爾將安之天濶風霜
渺不如刷勁翮去躡鴻鵠矯

龜山寺詩

夕照銜半壁煙霏淡橫練呼風掛帆席晚著淮東岸波
流蕩伏龜山脚挿秋漢白塔歛飛動紺宇鎖華煥小閣
候潮平微徑依山轉雲林杳靄間歷歷皆奇觀十年客
京洛每抱轅駒歎何意頓蕭然朝來舟出汴眼界霄壤

分骨相仙凡換驢從秋後肥米到淮南賤幸脫兵火餘
苦為塵網絆滄海寄餘齡去此不難辦招邀謫仙人騎
鯨遊汗漫

儀真宮玉清昭應宮成鑄聖像於此

樓觀俯長江竹樹蔽修嶺入門却立驚清曠非人境福
地包形勝真儀入範鎔護持國祚永報貺年穀豐蓬萊
杳莫尋弱水三萬里我欲試丹訣誅茅或在此神僊可
學否要且扶頽齡生當兵火日飄泊安得寧愛之不可

留弛檐休信宿白鶴唳石壇香煙遶雲屋夜久萬籟息
松風度玉琴瀟然不能寢相伴一哀吟

舟行著淺夜泊中流

雪漲秦淮水春生白鷺洲前棹歌發送此一葉舟轉
施起帆席快甚誰能收舟師拙於事遂作中灘留支撐
莫動搖喘汗徒呀咻彈繩測河道篙竿伺潮頭踈蓬雞
柵低兀坐如拘囚仰羨雙飛鵠安得從之遊日落暮雲
碧波光澹如秋四顧渺無極黯黯令人愁黑風卷半夜

大浪掀中流傲兀不能寢取酒聊相酬人生天地間大海一浮漚風水審如此蛟龍應見求未脫干戈地敢為身世謀醉酣還就枕吾已信沉浮

吳帝廟

阿瞞鬼之雄掌握弄神器孫劉相繼踵分爭足鼎峙
吾僅自保終作降囚系智力非不如亦各論其地吾聞
隆準公幾為強楚斃轉粟收散兵正賴關中勢中原乃
腹心四肢吾所制英雄建立初豈但夸一世處之或不

然果非長久計古人今復生此論無以異

泊震澤道中步游善宥寺觀芍藥回舟中小飲

用范四韻

非才與時背空手行路難朱門極嚴冷
回首不可干初欲効寸進挽舟八節灘
雅意同心人贈之雲錦端雖云食破硯
渴擬回狂瀾胸次竟莫吐千丈虹蜺蟠
誰復議行藏浩歌空倚欄南來寄疎蓬
蝦菜豈所歡尋幽偶一笑芳葩發奇觀
念爾託根遠香色不易完姓名逋客晦

風味書生酸作詩慰流落激烈窮雕頑愁人多苦語步
遶吟且看歸懷止惋結賴此杯酒寬忽忽時歲邁淒淒
風雨殘曷當三徑歸暫卜一枝安寵辱何定物向來心
已闌

過平望趨吳興阻風遊殊勝寺用益謙韻

暮暮踈雨歇冷冷晚風清扁舟泊清淺落日涵空明門
臨稻畦沒水浸莎岸平欠伸得寬曠杖屨喜微行招提
掩深靚房戶開斜橫紛紛諸衲子尚作迎送情神武行

掛冠吳市今變名及聞名理談頓覺肝膽傾凡籠了無
著古佛當自成已復外身世何者為官榮同遊有亞父
早定登壇盟歸來不受賞慨慷羞論兵閭閻取封侯健
兒勝書生因之發深省種種鴻毛輕

過子陵灘題僧舍壁

山水莽回互轉眄圖畫間念此清絕地昔人所盤旋舟
子相歎嗟示余子陵灘有臺出山半藤蘿蒙蘚斑緬想
建武功用人及茅管躡取汝潁士列宿樞極環中有貧

賤交客星犯帝闕其能榮辱之但及平生懽志願乃有
在歸歟一漁竿高風邈千載獨立誰躋攀山僧本何知
結屋臨清灣笑謂舟中客何為爭嶮艱權門有遺咏造
請無寒暄囁嚅到童僕俛仰慚衣冠所得諒幾何赭汗
流面顏偃鼠不過飽鷓鴣亦求安子能了此義分子一
席閑

奉送呂若谷縣丞任蒲東歸五首

著鞭愧後發挾矢爭先登肯顧危機在尚以智力矜曷

不往試之投足還兢凌寄謝婁羅兒老矣病未能

三年巽亭上看盡洛中山山亦為君好朝昏圖畫間那
知張季鷹高興不可攀忽見秋風起東隨洛水還

巽也幕府舊

聰問
叔巽

阿升交分深

丕問
季升

與君均骨肉况乃

相知心遽復捨我去倍覺傷離衿高亭東望眼從此費
登臨

夫子有高趣一官聊爾耳獨騎破虎韉憔悴洛城裏緬
想文穆公青嵩照伊水百年風烈在須公一振起

忽忽歲華暮悠悠心事違此行元自懶前計頗知非公
有酒堪隱我無田可歸月明枝未穩誰念鵲孤飛

真率會諸公有詩輒次其韻

山林與鐘鼎出處無異趣芻豢等藜藿同是一厭飫此
心無適莫外物曾何忤奚獨淡交遊未肯廁紈袴故尋
漫浪人要作尋常聚主既不速客客亦隨即赴傾談劇
懸河酒快流靈百年人醉醒萬物皆僑寓云何造請
門日滿戶外屨却想耆英遊風流甚寒素淡然文字歡

一笑腥膻慕我亦蹭蹬餘早向危機悟絕意鴛鴦行幸
此松蘿附君詩妙鋪寫縱橫俱中度我老學荒廢一詞
不能措獨於樽酒間不惜淋漓污何當賦歸歟去斂頭
角露家有鷹門兒稍能隨指顧鷄黍林下期視此猶應
屢有興即放言安能限量句

寄金陵諸幼

去年都城開南下相繼踵我亦具扁舟携汝百指衆汝
寧為我累我獨於汝重今而暫相遠愁亦慮汝共因人

問在否未語先悸恐淚下復吞聲寢愕不成夢倘有相見期勿復藉官俸一飽不求餘去辨南山種

七言古詩

乙巳二月初八日集獨樂園夜飲梅花下會者
宋退翁胡明仲馬世甫張與之王子與林秀
才及余凡七人以炯如流水涵青蘋為韻賦
詩分得流字

孟公飲狂車轄投不適遂與俗沉浮謫仙醉吟驚冕旒

氣侮權倖無悔尤不如淵明此意俱悠悠飄然不繫之
虛舟偃蹇不從刺史遊遇酒或能道上留介不為高
通不偷亦知出處非人謀人生一世罹百憂驚風變滅波
上漚胡為滯此胸中愁聖賢清濁皆友儔九老前塵邈
難求七交高躅或可侔百年典刑今在不振起此風須
此流亭亭玉立郡督郵文采秀發中甚道絳帳先生兩
清脩和音相答鳴琳球靖居之孫髯而脩昂藏野鶴橫
高秋林生風度和且柔抗論直欲輕王侯河南遊刃无

金牛弟兄傳家才術優老成不堪冠屨囚人憐拙甚營
巢鳩羈窮動輒遭寇讎但欲縮首眠黃紬何意獨蒙公
等收歡然一笑回青眸空囊未分一錢羞典衣猶得事
勸酬南州竹樹相庇庥步隨流水尋清幽尚嫌白日多
喧啾少待月出東南陬黃梅一株香颼颼青蘋浮水涵
春洲那知落雪紛滿頭但覺香露沾衣裘一醕百罰寧
論籌嗚嗚自作秦人謳快談慨慷雜嘲咻凜如武庫森
戈矛天地萬物窮雕鏤往往出語夸何劉却視萬物皆

虬螭便擬騎鯨跨九州誰能疊麴築糟邱所願酒泉生
酒甌此生痛飲无罷休

次韻退翁遊北山之什

孤雲天末山數峯峯頭隱隱銜烏龍遙臨北嶺望故國
行歌負販舟車通時當高秋雨霜後木葉紛亂號悲風
聲華一夢水流去名跡千古山爭穹津橋煙草闕雙峙
馳道莓苔門九重鳴鑾飈馭杳何許蓬萊頂上雲濛濛
徒驚朝市屢更變遑問邱壠多英雄鼎湖龍去自不返

非煙長鎖琉璃宮當年真聖受天命香生菡萏祥光紅
宮前父老尚能說顧瞻遺宇悲涕中橋山松柏闕弓劍
有時寶氣飛長虹今主紹述更神武回眸一視雲煙空
請封章疏幾時上振蹕行聞來自東功成亦念初基業
從此不復言兵戎我生多難傷睽離茫然却顧當何歸
伏轅不作馬思奮塌翼應憐鳥倦飛臨風且共一盃酒
要看酒面吹瀾漪不須遐想念今昔吾廬好在尋歸期

雪中獨坐退翁索詩

東風解放狂花飛何乃尚容寒作威了無賓客共携酒
更有人家來索詩天高雲漏不遮月皎潔上下同澄輝
亭前有樹高百尺為借驚鳥安一枝

戊申正月行在參吏部示諸幼

秋風鼓棹長蘆渡吾與若曹俱豁然脫跡干戈玩清絕
収身溝壑厭肥鮮折腰為米豈所願賣劍買牛端可賢
韓公雅欲却窮鬼趙壹其如無一錢罷官清坐乃吾分
號寒啼餓誰汝憐政緣茲事藉升斗使我不得休林泉

日下揚州行在所寸長片善希陶甄汗衣塵帽門戶底
包羞忍耻王公前此行寧復作此態疇昔相知吏部銓
謹嚴資格可馴致雖甚不才無棄捐我已投誠永結好
相從綠髮至華顛矧復鴛鴦滿臺閣功名合在中興年
縮頭袖手正應爾敢問祖生先著鞭

京師次韻邵澤民憶擬江梅花

憶並條山訪雲屋渡水涼颼散芬馥一枝璀璨端可人
步遶微吟揩病目作意題詩向我夸只今窓戶知誰家

伶俜瘦馬京塵惡障面羞看檐上花

役所寒食即事

疲民正苦淘泥沙彼何人兮怒且譁
麤狂不肯道姓字呼前醉態猶欹斜
自言寒食身無事快意欲嚼遑恤他
羈愁我自感節物遣去不問徒咨嗟

余去秋七月登舟逮此一年矣六月晦日午睡
覺聞兒女輩相謂曰明朝又是秋風起推枕
悵然走筆記之

流萍斷梗飛花委四海茫然無定止古今本是一郵傳
况乃其中悲轉徙秦淮霜葉亂楓林茗雲春風泛蘋芷
薄酒時時伴兒女踈蓬處處愁烟水故鄉知是幾長亭
眼暗相望越千里悵念征鴻一紙書明朝江上秋風起
泊桐廬縣合江亭下昔有得道之士不知姓名

結廬山間手植桐數本因謂之桐君縣亦以

此得名

是日雨

桐廬縣前江合流合江亭下多客舟紅樓參差出木末

小市宛轉依巖隈
桐君手植碧桐樹
歲歲春風柯葉柔
白雲一去鳳不至
暮雨丁零生客愁

舟中呈耿元直

念昔一笑相逢初
我時尚少君壯夫
十年再見輦轂下
我鬢爛斑君白鬚
落魄朋遊嗟我在
艱難兵火與君俱
酬恩未擬填溝壑
強顏忍復陪簪裾
浩然胡不徑投劾
老矣難堪歸荷鋤
田園墳壠亂戎馬
是身是處長羈孤
解維汴岸一篙水
小舟漂兀如鷺鳬
對床推枕坐歎息

此行未肯悲窮途胸中炯炯時一吐與生俱坐寧遽除
只今雲臺羅俊彥鄙賤老醜憎樸踈躍馬食肉付公等
浮家泛宅真吾徒與君轉柂從此逝秋風萬里吹江湖

閱陶集偶有所感

彭澤縣令八十日束帶耻為升斗污二十四考中書令
端委廟堂揮不去兩公於此固無心鐘鼎山林隨所寓
慎勿蹉跎兩失之歲晚要尋栖息處

謝人惠麥穗

愚軒卧病空瓶儲市米不得如求珠鄰翁餽麥穗盈筐
或揉或簸喧庭除磨雷隱隱破霜辦家童執爨煙生厨
須臾粥成勸我食齊眉舉案煩妻孥病餘聊復潤喉吻
軟滑盈盈如膏酥宛然長粳欲爭長加以白豆為參輿
童兒作顰若不足老夫大笑為有餘虎頭食肉非不美
回視利害為何如平生不耕啖此物壠頭汗滴慚耕夫
淡中有味足養福為君努力食一盂

五言律詩

附五排

車駕還汴

孝感天心格憂勤國步艱賈生休賦鵬貢禹欲彈冠
白髮他鄉客清尊此夕懽如聞京兆尹拜表請回鑾

圍城次退翁韻

甲馬分諸道舟車會此都前王端有意異世肯同途
人物風流盡公私府庫虛百年餘故老相遇涕漣如

將歸先寄諸幼

擾擾干戈地懸懸父子情人間正多故身外復何營我

已忘官寵兒須辦力耕歸家休歇處團生話無生

還家示諸幼

避地重遭亂還家幸再生一身今見汝寸祿敢留情更
恐死生隔渾疑夢寐驚吾今猶有愧未遂鹿門耕

還家

但切思家念那知行路難盃盤無作具菽水自加餐竹
老風聲勁山深夜氣寒肯教孤枕夢容易到長安

馬靖國後軒

性靜交遊少身閒日月長
忘言千句偈宴坐一爐香
世有流離苦人趨聲利場
此間亦何事高卧傲羲皇

蒲中次韻提舉趙正之秦亭唱和五首

雲端貝闕見鰲負海山來瑞氣
元非霧天風不染埃
頌常八柱建象魏五門開
肯構經營念貽謀丕顯哉

丁丁谷聲響泛泛棹歌來
淨港時吹浪中流或起埃
亦知從地出幾若鑿山開
帝室須梁棟斯功當念哉

隴樹迎人去關雲逐馬來
淒風搖白草落日蔽黃埃
仗

節身方遠逢山眼暫開却臨分水處蜀道賦高哉
要作哦詩伴何妨結駟來瓊林有餘韻水檻絕纖埃醉
膽江山闊吟毫花草開只應聞鴈夜夢枕思悠哉
追隨六郡子深入塞雲來關路春飛雪沙場夜漲埃戲
園千騎獵笑挽六鈞開歷歷經遊處初心已矣哉

再到蒲中遊穆氏園

懷感花無數其時春正深如今重對酒感舊獨傷心山
鳥那知此向人猶好音東城多樂事疇昔共幽尋

贈普照監院

陝人也

飄泊嗟何往歸來恨莫從
師猶作秦語我已效吳儂
水淺長河浪山低太華峰
幾時攜手去南北本同宗

六合縣相僧

門外江南道瀟然誰與同
禪心達生死道眼識窮通
聊為機緣起懸知色相空
有人真勇退不到急流中

中秋呈元長

江上中秋月天邊白髮翁
一輪還自滿千里共誰同
擾

擾干戈後栖栖羈旅中持盃那復問一醕百分空
誰作清光伴瀟然屬兩翁他鄉多病後竟夕一樽同孤
杵征衣淚寒沙戰角風何由遂心賞幽思渺秋空

中秋醉後

顧影不成舞披襟欲御風人憐經歲別月與舊時同鶴
警露華白魚潛水鑑空舉盃還徑醉歸夢廣寒宮

九日置酒坐上呈元長

未厭山林僻那知節序遷高閑愛重九安健又今年物

外無疆鎖樽中有聖賢黃花自衰晚勿復笑華顛

毗陵道中

烟水毗陵道光涵落月空夢魂塵壒外眼界畫圖中舟
漾安期鯉帆飛禦寇風鑑湖如可乞歸老浙江東

登蘭溪亭

帆落溪風轉山明霧雨收登臨本乘興惝恍却生愁獨
鴈竟安往潛魚不可求何年定歸計復此過扁舟

左馮翊寄東鎮張致一兼簡聞喜親舊

一官馮翊郡為况
定如何水似古桐
苦風如東鎮多幽
心迷簿嶺斷夢阻
關河賴有清樽酒
時時一醉歌

次韻富季申寄示

相期念疇昔道在
敢憂貧分手便千
里論心復幾人微
詞動招謗爛醉可
藏身第恐先求舊
黃麻起世臣

次韻富季申雪中
即事時聞北敵起
兵京師戒嚴二首

東風花萬點落我
酒盃間欲和郢中
曲先頽坐上山威

稜徒料峭生意自爛斑誰是淮西將提兵夜斬關
無才居客右孤坐一窻間夢到廣寒殿人來姑射山
低明佩冷粧罷落花斑便欲凌風去天門隔九關

後數日雪再作

三見江南白端來伴酒樽作寒催歲暮流潤壓冬溫
雲卧山容濕天低水氣昏東風猶有信昨夜到前村

發杭州有訝太遽者

未著絕交論但歌招隱詩人間審如此身外復奚疑
喪

亂物情薄奔馳智力疲溪山有佳處投老更何之

東軒即事二首

投閑非避世導引學修真物外元無事壺中別有春
水聲清夢寢山色上衣巾已矣將安往鄉關渺戰塵

原憲貧非病淵明懶是真詩留百年債酒占四時春
泉石高涼地祠官自在身叨蒙有如此何以効涓塵

聞有長沙之命

安土無南北論情皆弟兄休尋卓庵處要便打包行萍

跡雖無定葵心終有傾相望得安健有使即傳聲

泊小金山覺渡寺僧言建德知縣桐廬知縣婺

州教授皆被召

敢歎邊氛熾今聞公道開中原非世事南國自人材
朱履羞彈缺黃金謾築臺天涯轉蓬恨何地賦歸來

登舟示邢子友

盡室嗟何往窮年浪自悲才疎身潦倒地遠跡孤危風
雨江南岸豺狼天一涯畏途端可憫薄宦竟奚為已失

田園計難忘升斗資毋煩俗子問有媿達人嗤病馬思
春草驚烏遶夜枝登舟一長歎此意只君知

聞郭瑾懷甫除郎

開封司倉

至治本無為何曾帝力知人惟求俊彥天畀濟艱危
席尊黃髮星郎用白眉鋒芒森武庫律呂奏咸池海內
想風采朝中增羽儀餘光被草木盛事播聲詩感會唯
千載飛騰各一時著鞭今更懶投劾去奚疑亦有乘軒
戀其如續脛悲銜蘆聊避弋遶樹未安枝念舊多生死

思鄉久別離自餘復何道湖海是歸期

七言律詩

七排附

秋試鎖宿府學

悄無人語到高堂爽氣侵凌枕簟涼木葉彫風秋瑟瑟
簷花流雨夜浪浪燈明疎幔孤光暗蛩咽空堦怨緒長
心願無期清夢斷一爐沉水自焚香

登第示同年

氤氲和氣鳳城春正是英豪得志辰雨露九重均造化

丹青千字富經綸古來將相皆由此今見詩書不悞人
何處寒鄉少年子綠袍歸拜北堂親

守官長道之岷南過馬務寨示知寨石殿直

夜闌不鎖戍無兵負販行歌樂太平綠野牛羊新牧地
顏垣烟草古邊城山川自昔留形勢基業今誰問戰爭
隴上少年多意氣彎弓徒自詫功名

酬贈黃倅

翰墨文章妙若神風流談笑絕纖塵才華最盛東西蜀

聞望相高一二人清奪峨眉千歲雪麗如錦水萬花春
我生不識東坡老猶及頤庵見後身

馮翊次韻邵子文寄贈之什

三見西風洛水秋歸心長共水悠悠扁舟未遂蓴鱸願
俗駕空貽猿鶴羞可見飄零疎酒盞更慚落魄問朋游
回頭一笑君應會薄有田園歸去休

夜送客至馬鳴橋

滿眼塵埃懶據鞍暫逢清景即怡顏月明夜水平低岸

煙淡秋林倚半山
隱退謾留他日計
居貧未放此身閑
老來媿取移文誚
會整怱怱俗駕還

從軍滑臺

中原何自假遊魂
帷幄奇謀妙若神
沙漠宣威元有將
燕然勒頌不無人
山川流恨荒涼地
桃李無言寂寞春
炯炯孤懷竟何補
猶能狂飲吐車茵

碌碌功名安用之
更堪心事巧相違
祗緣叔夜此生懶
更悟淵明前日非
客舍那知春色暮
東風但見柳花飛

瀟湘亭下煙波好送我如將短艇歸

登廓軒用王穆之秀才韻

臨高懷遠悵夷猶放目微吟竟日留
一鴈北來天杳杳
片帆東下水悠悠雲烟慘淡關河暮
風雨淒涼觀閣秋
回首何由叫虞舜蒼陵山色向人愁

河南留守王大資

退卧東山自在身幡然猶肯慰斯民
名高海內推前輩
德冠朝中號偉人
紫誥即看還舊物黃扉終許秉鴻鈞

瑤池花有千年實更看東風幾度春

洛陽九日次韻縣尉

是日司馬文季西歸因以寄之

誰遣孤標最晚芳寒蜂冷蝶尚能狂不禁清瘦西風緊
薄洗鉛華曉露香照影一樽聊作伴誅茅三徑莫相忘
他年載酒能來否相見懸知話更長

貧病侵尋不少寬行藏何事更憑欄兒曹不解市朝隱
我輩政宜文字歡客恨向來隨處有秋風待此著人寒
賓鴻旅燕元無定莫把黃花取次看

次韻縣尉

勞人州縣若為情，蹭蹬窮途已半生。
愁滿西風雙鬢白，夢回中夜寸心驚。
每慚彭澤辭升斗，終合吳門變姓名。
且把黃花泛盃酒，秋深蕭寺有餘清。

縣丞呂若谷置酒巽亭

涼風收雨斷晴霓，漠漠青山白鷺飛。
竹樹蔽虧涵野色，樓臺滅沒淡煙霏。
凌波鳴珮杳何許，駕鶴吹笙殊未歸。
悵念夷猶淒望眼，碧雲千里又斜暉。

荒煙蔓草接平林景物蕭蕭秋意深
水濶山長人去遠雲閑天淡鳥飛沉
宮前離黍他年恨關外西風別夜心
莫倚欄干重留客子山從此費悲吟

再用前韻

萬里高空卷素霓徘徊幾點暮鷗飛
波平浴浦棹歌遠風裊宮樓香霧霏
猿鶴山中應怨別尊鱸秋後合思歸
此間自有江淹賦不用桓伊恨落暉

一枝枝自寄深林何得翻然著意深
塞上亦知無馬失

江邊誰問有舟沉
煩君爛漫千鍾酒
慰我登臨一寸心
醉後狂歌歌更切
未應愁減越人吟

次韻張與之登巽亭

百年遺恨了難平
只有南山不改青
橋下溫波秋渺渺
樓頭霏霧晚冥冥
祥鍾福地衣冠盛
氣潤中天草木靈
那得丹青繪縑素
煩君妙語寫無形

霜洗殘秋暮吹驚
長林蔓草斂餘青
忘機獨鳥臨清淺
避弋孤鴻入杳冥
老矣未成南畝計
歸歟空媿北山靈

獨憐亭下瀟瀟栢能伴幽人槁木形

洛中次韻河南令王子與觀梅

桃李叢中獨立難
自憐孤艷怯春寒
微風只解分香去
流水猶能照影看
冷落霓衣慵按舞
爛斑粧粉未勝冠
留連芳酒無嫌晚
要與涼蟾共倚欄

定海路中觀梅

傅粉生香作意開
柔情似欲挽人回
猶憐行役匆匆去
不是尋芳得得來
姑射山頭若冰雪
謝家林下絕塵埃

空江月落東風冷誰並孤舟一笛哀

建隆寺詩

天上旌旗照海隅規模想像百年餘雷霆號令推神筆
龍虎風雲識識書顧盼八方平僭亂謳歌幾世樂耕鋤
他時誰唱紛更術不念艱難樹立初

紅門埽役所觀河

砥柱西傾朔野寬魚龍掀舞去漫漫潤蒸霏霧一川暗
怒激驚風千里寒九折勢須回故道三山天為障狂瀾

尋源不作乘槎計
滄海他年一釣竿

役所寒食晚歸

永巷疎林棲鳥還
幽花蔓草慘荒煙
悄無人語寒食後
時有雨點黃昏前
孤坐何從得言笑
一樽不復論聖賢
酒酣縮首絮衾底
屋頭浩浩南風顛

之官開封泛洛東下先寄京師故舊

滄波東下武牢關
物色人情共慘然
草檄舊傳驃騎府
浮家今在孝廉船
向來戎馬知何補
老去江湖定有緣

無限青雲著鞭處
固應分付祖生先

暮春

花開花謝總無心
轉首薰風綠滿林
人事不隨春事了
眼雲空與暮雲深
錦鳩呼婦商量雨
白蟻排兵做弄陰
除却牆頭老山色
更無佳客肯相尋

和元長暮春

坐歎空山落景催
幾時江上葉舟回
初無妙術留春住
強覓餘歡傍酒來
體力寒多便故絮
齒牙衰甚怯新梅

秦川洛水繁華事白首天邊共此盃

別張德遠詩

殘蟾衰柳伴牢愁把酒悲歌汴水秋
契濶死生俱淚下功名富貴此心休
殺雞為黍思前約問舍求田媿本謀
又向春風話離別此生計日悠悠

清涼寺

數壘小山松桂幽能令盛暑作涼秋
故宮於此有遺跡客子暫來生許愁
萬頃雲波朝古堞一簑寒雨送扁舟

他年圖畫歸攜取要使北人清兩眸

將發泗上

客裏尋歡豈易謀
牢歌誰與散幽憂
可憐僞父雙蓬鬢
長寄吳儂一葉舟
陶令早知今日是
庾郎能賦此生愁
殘年流蕩歸無處
蘭芷蕭蕭江上秋

至宿聞陸昭中病瘵

偉幹亭亭嘆輟鱗
弊裘破帽厭京塵
一官耻作兒女態
扁舟去卜漁樵鄰
他鄉未辦饘粥計
何物更能寒熱人

努力扶持飽吃飯秋風江上正鱸蓴

示陸昭中

執耒田園正所圖無心重整少時書功名常若歸難必
拙直懸知退有餘避謗杜門賓客絕病痰妨飲酒盃疏
平生剛笑孔文舉老我年來百不如

六月十三日書呈元長

心遠由來絕世紛更尋邱壑避囂塵門闌已覺貧無事
賓客應憐老畏人詩不名家免招謗酒雖作病要全身

香山千載流風在鷄黍他年早卜鄰

用元長韻贈空老

虛懷無地著纖塵獨鶴孤雲寄此身
琴發清彈廬阜月詩探妙意武林春
少陵深契贊公語惠遠能知陶令真
擾擾今誰同此趣容車山下兩閑人

夜坐

寺樓鐘斷鎖長廊誰共蕭齋一炷香
書冊自能留久坐燈花還解勸餘觴
風回絕壑沉虛籟雨入幽林送嫩涼

老懶由來貪睡美秋衾不怕夜初長

泊真州聞外詩

南來繫纜楚江臯孤客羈心正鬱陶海氣連空山色暗
秋陰覆地水風高屋頭水電敲寒雨枕底春雷簸怒濤
一點青燈雙白鬢可無樽酒伴離騷

過高郵飲張才甫家作詩為別

短棹人誰識姓名相逢况是十年兄江關契濶秋來恨
兵火流離別後情高論看君揮麈柄雄圖憐我付楸枰

酒闌月落孤舟起便是江湖萬里行

和鄭有功次范元長韻

憑陵風雪不相貸逋客向來生事寒京國回頭九關隔
江湖弔影一身單著鞭意氣初非淺唾手功名不作難
老矣收心定何許蓴鱸聊饌腐儒餐

歲晏感懷

欲雪濃雲凍不收淒寒偏著敝貂裘客愁有許要排逐
歲事無多難挽留疇昔謾懷三徑約飄零聊用一樽酬

即看瑤草光風轉作意湖山汗漫遊

掃蕩邊氛漸有期此生已復歎差池眼中種種無聊賴
身外悠悠徒爾為彭澤歸來那得酒少陵窮甚但哦詩
卑棲僅遂桑榆晚敢並鶯鴻接羽儀

卧病一首

己酉
正月初

此生已復外升沉出處由來著意深拙甚但知閑可樂
災餘猶有病相尋貧難調護漳濱卧老自消除魏闕心
莊舄鍾離各懷土吳兒莫笑作秦音

次韻子蒼諸公韻

亂來那復較升沉，愁極仍嗟病骨侵。
雙袖龍鍾羈客淚，一樽傾倒故人心。
沙寒獨雁難求侶，山近浮雲易作陰。
落軫斷絃非衆聽，暮年淮海歎知音。

再用前韻示范六

舉目山河往恨沉，吳霜一點鬢毛侵。
飄零顧我非前日，慷慨唯君識此心。
香散藥畦花漫漫，波侵蝶沼竹陰陰。
平生載酒論文地，鴻鴈歸時問信音。

將至三衢楊村道中小飲

衢江波上半帆風散髮蓬窓笑傲中
晚境但深耽酒癖窮途猶愧作詩工
天邊壠坂三秦阻海上山川百越通
得盡餘齡安一飽此身何敢較西東

長沙倅劉元舉寄示參議伯山酬唱之什因亦
次韻二首

揮毫曾看妙如神傾瀉明珠百斛珍
疇昔笑談知寡和後來風度絕無人
應憐老矣紆朱紱早約歸歟岸角巾

明鏡未須羞鬢髮一樽相與永青春

秋風澤國正鱸蓴歸意長隨陸海珍簿領窮年迷舊學
瘡痍千里愧斯人袖中本是釣竿手頭上無非漉酒巾
節物驚心勞夢寐衡江西岸小梅春

送張京與之宰解縣

憶嘗從事舜蒲州把酒論文並俊遊千古關河增義氣
一時人物最風流飄零無復相從樂潦倒難堪送別愁
為我去尋山下路疏雲流水五峯秋

得蜀信

雲水關山恨渺茫尺書能慰九回腸
劍南親舊知安健陝右兵民亦奮揚
契濶十年悲故國飄零百指滯殊鄉
何由結伴春風暖也向襄陽下洛陽

寒食日書事

江海飄零幾送春飛蓬無地寄孤根
夢回南浦人千里醉倚東風酒一樽
可是今年暗寒食不堪多病怯黃昏
兒童自趁秋千約花落空庭獨掩門

清明詩

鄉書難附北歸雲
燕子猶尋舊主人
流水迢迢長念遠
飛花糝糝又傷春
向來軒冕非吾意
何處園林託此身
只有長歌一樽酒
暮年風味最情親

和元長書懷二首

神靈久憤敵塵侵
畀付經營惜寸陰
聞道倒戈回易水
行看休戰牧桃林
寧論少壯非前日
及見升平亦本心
亂後親朋無恙否
試憑北鴈寄歸音

孤懷詎勝百憂侵
息影由來貴處陰
志謝長嘶走千里
身如倦翼返深林
雲山處處明雙目
樽酒時時洗寸心
更賴清詩為陶寫
朱絃流水歎遺音

晚風定放小舟江心

蕩漾扁舟入渺瀰
一夫搖櫓疾如飛
涵空鑑影月光淡
襯地羅紋風力微
未擬然犀窮水府
猶能酌酒勸江妃
眼中清絕非人世
定使魯連何許歸

同苗秀才楊山人登舟

本無籌策堪人用，盍掛衣冠遂物情。官職向來滋味薄，
干戈經此夢魂驚。君猶極口談經義，我已無心卜死生。
何必吳門變名字，煙江萬里葉舟輕。

靖安道中見梅

塵容俗狀早知非，脫迹歸來喜復悲。隴上人遙千萬里，
江邊花發兩三枝。兵戈阻絕書難到，雪霰飄零鴈去遲。
跋馬東風一回首，落英還與淚紛披。

又泊蘭溪亭

孤帆薄暮轉清溪空翠回環望眼迷夢想莫知家遠近
羈遊將遍浙東西歸來分合投閑散老去情猶惜解攜
明月深林有烏鵲悲鳴未許一枝棲

發四明奔昌國用韓叔夏韻呈覺民叅政

曉掛危檣兩席開孤城西望幾時回飄搖一舸隨潮去
彷彿三山入眼來身世從今寄雲海親朋何在渺風埃
乘桴肆志吾安敢就戮鯨鯢亦快哉

過石佛洋

鳴鐃疊鼓兩山傍
曉泛回潮石佛洋
漠漠東風吹瘴霧
瞳瞳暖日上扶桑
如聞鶴馭來空濶
知有神洲在渺茫
何必山林啗靈藥
他年鼓枻訪東皇

越土水淺易涸而近山無木可採故常有薪水之憂既歸黃岡遂脫此責作詩示同舍

經年薪水困行朝
一日歸來百念消
泱泱溪流鳴枕下
丁丁谷響應山椒
小安課伐猶多事
無復移居莫見招
老矣羞為吳市隱
買田從此混漁樵

丁未冬同陸昭中渡江泊秦淮稅亭之側癸丑
三月自建康移守南昌登舟顧覽即昔年繫
纜之所也時昭中亡矣感歎存沒作詩寄黃
岡親舊

江湖南北寄飛蓬歎息流光俛仰中千里月明人念遠
一年春事水流東驚心存沒風花轉閱世悲歡夢境空
欲寄此情那可盡相逢唯有一樽同

次張真君韻

聞君結屋臨山礧多種黃精與紫芝雲氣每占華蓋頂
松陰長護玉津池溪流盤轉近百里山色清虛無一姿
傳得僊人新句法封題遙寄五言詩

中秋夜清坐讀歐陽公正統論二首

稍覺清涼換縠衣獨憐衰鬢與秋期清樽浪作經年計
黃卷長懷萬古悲蛩咽幽吟愁露草鵲翻寒影遶風枝
此生此念能忘否夢破蒼龍西去時

露濯秋空灝氣生沉沉天宇夜空明南樓老子興不淺

赤壁先生夢更清
小艇擬尋銀漢路
衰砧還起玉關情
何心把酒論歡賞
細字文書對短檠

九日晚坐獨酌一杯

木落江城風露寒
坐驚芳歲逼彫殘
晚來自愛一杯暖
老去元無九日歡
擬借靈均蘭作佩
尚餘陶令菊堪餐
平生徧挿茱萸處
短夢悠悠行路難

泊舟鹽橋兒子洙輒於市買厯尾題云客裏其
如日費多因取筆足成一詩

五
蹭蹬生涯一釣簑
東西淮海信濤波
亂來益覺人情薄
客裏其如日費多
麟閣壯圖今老矣
菟裘歸計奈貧何
越吟楚奏那能已
時倚哀彈拍棹歌

雪中與洙輩飲

朝市邱園定孰優
要將閑適換深憂
門闌終日斷還往
父子一樽相勸酬
雲鎖山林寒悄悄
風吹雪霰暮悠悠
醉餘身世知何許
莫向東陵覓故侯

大雪連日不已

日日愁陰慘不開驚風和雪振窮埃百年未省南州見
千里應隨北客來塞馬曉悲沙上月隴人遙恨笛中梅
獨憐寸草滋榮意知道春從斗柄迴

雪晴東軒獨坐

雲山回合翠重重不放幽人遠目窮高竹有時催凍雪
饑禽竟日咽悲風悠悠事與本謀異擾擾人誰此意同
却坐蒲團聊袖手更無一語可書空

過石門洋

平生戎馬踏塵埃晚看滄波眼漸開
眩轉忽從千仞落低昂時見一山來
風頭漸瀝吹成雨枕底鏗轟怒作雷
雅欲騎鯨傲人世吾其於此賦歸哉

丙子夏病卧汗後

按丙子於紹興十七年丁卯
逆溯丙子則年纔十二歲不

應有殘生兒女之語疑是
紹興十四年甲子之誤

枯腸得水若通靈
溟汗周身一雨零
行客筋骸困方歇
醉人心骨喚初醒
病蟬移夢入新殼
老鶴息神梳舊翎
乞得殘生對兒女
不愁無粟貯陶瓶

河中太守

掄才梁棟定誰須
聳拔長松第一株
令聞允為時屬望
豐功當在帝都俞
將令異日作霖雨
暫使斯民歌袴襦
播物仁風隨扇發
向人和氣與春舒
請看嶷嶷諸郎秀
是應詵詵盛德符
廣陌乘黃將驥子
丹山威鳳帶鸛鵒
聲名最重連城寶
文采光騰照夜珠
賈誼著書驚一世
平津射策冠諸儒
傳經固自卑劉向
遺直猶資見魏謩
便向萱堂生月桂
更尋雲路種星榆
人從碧海偷桃實

客自朱門墜鳬性靜綠龜宜作伴身輕靈壽不須扶
金波滿泛鵝兒酒香霧爭持鵲尾爐要識東人念公意
巖廊千載贊昌圖